



Fasnacht 2000

Sujet	Schnägge-Boscht
Ladäärne	hämmer als Phäggli verschniert
Voordraab	isch us em Hyysli
Pfyffer	sinn Schnäggli mit Phäggli
Dambuure	sinn gääli Schnägge (und e Globi)

Ääne - dääne - disse,
i glaub die vo der Boscht sinn bisse,
d'Phägglischnuer isch däne allwäg grisse
und ich - ich föhl mi schampar bschisse.

Dyggel - daggel - doomynee,
d'Boscht will hinter my Portmonee.

Lirum - larum - Löffelstyl,
Phäggli koschte schampar vyyl.

Tüütäätooooo,
d'Schnägglisboscht
isch noonig do. . .



Wenn dym Schatz zer Wienacht e Phäggli witt schigge,
mit em'ene Gruess und em'ene Schmutz, em'ene digge,
due jo nit Bralinee und Blueme dryy -
bis zem näggschte Summer schmelze und verwälge syy.

Sii - ich due - dasch denn gar kai Witz,
mit Inbrunscht und ere innere Hitz,
Lotto spiile und rubble wie 'ne Gschörte;
Meile, Phünggt und Bonuskarte horte,
nimme fir mini alte Dääg aane spaare
und nummeno mit em Velo faare,
dermit ich mir - statt Ferie in der Karibik (wie die Maischte)
s'Porto für s' näggscht' Geburtstags-Phäggli
an miny Nichte z'Bümpliz kaa laischte.

Ich find' das iberhaupt nit luschtig und gar nit fair,
das Boscht em Pingu - dämm uf em Määrggli,
dämm glaine, häärzige, unterkielte Zwäärggli,
d'Schnuer wägno het am Phäggli - das mag en sehr.



D'Schnäggli - die sympathische, schlyymige Dinger,
mien - quasi als Symbol (mir isch es nümme wool) -
fir die globalisierte, Oberböschtlar z'oberscht oobe,
däne bornierte, (me zaigt scho uff si mit em Finger)
tschuld syy an dämm ganze Phägglidebaggel -
eso wie friener der Böschtlar-Waade-bissendi
Wachhund-Daggel.



Au der Globi,
dä uffgschtellt, fröölige Kärli,
wo mer alli kenne us de Märli,
het sy liebi Mie mit dr
Schnäggeboscht,
wo langsam isch und e huffe
koscht'.

Laider git's dä Bschluss vo dr Regierig,
fir unseri Boscht zer Privatisierig,
das gäb vyyl Gäld in d'Kasse vom Bund
- numme fir dr Kund laufft's nimme rund.

E Schnuer ums Phäggli? Froog nit eso dumm,
im Zwweifelsfall e Gummi drum!
Wenn'd uff Boscht muesch warte - sappermänt,
schrybsch gscheiter voorhäär dy Theschtamänt.

**Au mir sinn uff em Netz - dämm nätte,
wenn de wotsch kaasch mit is chätte.
Haimwehbasler rund um Bärn
hämmer bi de Mutze-Bebbi schampar gärn.
www.fasnacht.ch/mutze-bebbi**
